



Norbert Berther
Zarcuns/Camiscolas (1940-2021)

Cudischs e cultura han accumpignau il Norbert Berther durant si'entira veta. El ei staus in um dalla lavur tgeua, mudests, mo cun grondas habilitads. El ha fatg igl autur e rapportader. Siu temps liber dedicava el savens al scriver artechels, translatar e sco autur. Il rimnar, retschercar e scriver era siu mund. Per la vischnaunca ha el gia ils onns 1960 rapportau davart la politica ella Gasetta Romontscha. Tgei che succedeva en vischnaunca interessava el zun fetg ed el era adina sil current. Dad el derivan era differentas publicaziuns, aschia denter auter: 25 onns Cassa da spargn ed emprest Tujetsch 1944-1969; 50 onns Installaziun electrica Sedrun 1918-1968; Hanletg sur il cuolm d'Ursera; Guid pil Museum La Truaisch e per Cecilia Hendry-Schmid ha el ediu 2007 il cudisch da Cavorgia. Dil re-

minent enumerescha il register dalla biblioteca cantunala sut siu num ver curentina ga sco autur. Igl onn 2021 ha el fatg a sesez in grond plascher cun edir sias Regurdientschas religiusas da Tujetsch. In'ovra historica che preserva la cultura religiusa. Dasperas ha il feigl official dalla vischnaunca La Tuatschigna possibilitau ad el da far numerusas rapportaschas da quei e da tschei. Denton, sia gronda ovra ei senza dubi la Bibliografia retorumantscha e quella dalla musica vocala retorumantscha. Tschien paginas dattan perdetga da minuziusa lavur da rimnar e nudar, dus instruments grondius per la Romontschia.

Naschius a Camiscolas

Il Norbert ei naschius ils 29 da december 1940 a Camiscolas, Tujetsch, sco secund affon da sis fargliuns. Ils geniturs ein stai Alfons Berther e Marionna, naschida Schmid. Il Norbert eri ina affon fetg svegliau, marveglius ed attents ed hagi stunclentau bia gadas la mumma cun sias biaras damondas cun «daco» e «pertgei». El ha era gudiu da far enqual filistucca cun sias soras pli giuvnas. Savens era el sco buobet d'anflar a Zarcuns, leu nua ch'el ha lu puspei passentau biars dils davos onns da sia veta. A Zarcuns viveva la tatta da vart la mumma e quella fuva per el ina fontauna da historias, da detgas e praulas. Sco buob pli grond eis el staus fumeigl tier in pur, staus paster da casa

e lu schizun s'avanzaus a paster d'alp. Cun plascher saveva el da dir ch'el hagi fatg atras il svilup puril dalla lavur a maun alla mecanisaziun agricola.

Il bibliotecari

Las scolas ha el frequentau a Sedrun e Camischolas. Il giuven intelligent e svegliu ha vuliu studegiar ed ei serendus el gimnasi Maria Hilf a Sviz. Sia via veva el encaminau e perquei eis el serendus suenter la matura a Cuera el seminari da spirituals. Mo gia suenter in onn sto el constatar che quei ei buca sia via, la dretga via. El serenda el marcau da Friburg e terminescha leu la scolaziun a scolast secundar. A Cazas instruescha el in onn e danovamein fa el per senn che era quei ei buca sia via professionala.

Igl onn 1967 entscheiva el a luvrar a Cuera ella Bibioteca cantunala e quella lavur dat ad el satisfaziun e cuntentientscha e cuoza la finala tochen alla pensiun. Sia entschatta fa el sco catalogisatur. Ina lavur che pretenda exactadad e pazienza. Quellas qualitads possedeve il Norbert. Suenter entgins onns absolve el la scolaziun da bibliotecari diplomau a Turirtg. Sia lavur da diplom ei stada la Bibliografia dalla musica romontscha, 1986. Aschia s'avonza el a schef da catalog. El fuva era responsabels per la formaziun dils voluntaris. Tuts han absolvii cun success ils examens a Turirtg e plirs candi-

dats ha el survegilau e susteniu en lur lavurs da diplom.

Per siu grond cletg veva el ussa anflau sia via e sia lavur che purscheva ad el cuntentientscha e plascher. El viveva e luvrava ussa per propi en siu mund, quel dils cudischs e mellis e mellis cudischs passan atras ses mauns. Biars da quels ha el secapescha era legiu.

Bugen en outras tiaras

Fetg bugen viaggiava il Norbert viado el mund en outras tiaras. Siu interess era cheu la cultura ed ils cudischs. Siu horizon ha el slargau cun viadis naven da China alla Norvegia e dalla Russia a Canada. In da ses hobis fuva era il cantar. A Cuera eis el staus in fideivel cantadur e suenter la pensiun ha el susteniu cun sia vusch il Chor mischedau Sedrun. El fuva aunc activs el chor da sepulturas da Tujetsch dapi la fundaziun da quel.

Culla pensiun eis el secasaus en Tujetsch en ina casetta ell'ucliva Zarcuns. Leu en sia dimoria eis el s'engaschus per la cultura tuatschina. Siu grond engaschi ha el dedicau alla rimnada d'ina voluminusa e detagliada documentaziun dalla val. Aschia cumpeggia quella cudischs, artechels da gasettas, scartiras, documents, brochuras, fotografias e registraziuns da tut gener. In ver scazi. Cun agid d'in program special ha el registrau quella lavur a moda professionala. Quella vo-

luminusa perdetga culturala dalla Val Tujetsch ha el regalau agl Archiv cultural Tujetsch.

El ei beinspert puspei s'integraus ella cuminonza tuatschina cun cantar, viandar da cuminonza, dar troccas, visitar las occurrenzas, visitar di per di la meisa canorta ed era cun surpender in ni l'auter uffeci. Il Norbert era schazegiaus e carezaus da tuts, era sch'el tschintschava buca bia. Persuenter fuva el in apprezziau tedlader, denton, ed oravontut saveva el prender posiziun tier tuts temas e saveva rispunder competentamein a damondas politicas, historicas e culturalas. Quei fageva el cun bia plascher e cun grondas enconuschientschas. Siu meini era duman-daus e quei plascheva ad el ed el flureva quels muments quasi si sco ina flur.

Il davos viadi

Il temps da corona fa pitir el. El sesenteva isolaus e persuls e te-

meva da piarder tut contact cun ils convischins e las convischinas. Con leds eis el lu staus cu ina certa normalitad ha puspei possibilitau tec a tec ad el ina veta da cuminonza. Quei temps han sias forzas denton schau suentter, mo diligentamein mava el mintga di a Sedrun tiel caffè e suentermiezdi fageva el sia usitada spassegiadetta. Mardis, ils 28 da settember ha el fatg siu davos viadi da Zarcuns a Sedrun. Il Norbert ei buca pli serevegnius d'in accident, sto serender el spital e vegn lu deliberaus da tut quei terrester la dumengia, ils 17 d'october 2021. In um ruasseivel ch'ei s'engaschus sin sia moda pil beinstar general ei buca pli e manca el dafar da mintgadi. Segiramein lai el senza dubi anavos en Tujetsch fastitgs cuzzonts. Persuenter schein nus in cordial engraziel.

*Pil Forum cultural Tujetsch,
Tarcisi Hendry*